

ճառումից գոյացած գումարով օգնել ամենաաղքատ գիւղացիներին և կամ համայնքի ամենակարևոր ծախքերը հոգալ: Վեցերորդ՝ Բազուլի կամ Թիֆլիզի մէջ կազմել այնպիսի ակցիօներական-երկրագործական մի ընկերութիւն, որի անդամակցական վճարը սատշելի լինէր նոյն իսկ թէ միջակ քաղաքացուն և թէ գիւղացուն: Այսպիսով կկազմուէր մի խոշոր դրամագլուխ և այդ դրամագլխով կարելի է գիւղական բանկ հիմնել Ուտիացոց աշխարհի բազմամարդ գիւղաքաղաքներից մէկում: Երկրագործ ժողովրդի տնտեսական վիճակը բարեփոխելու համար կարելի է բանալ երկրագործական և գիւղատնտեսական գործերի վերաբերեալ պէսպէս մեքենաների և գործիքների մի մեծ պահեստ: Իսկ ազնուացրած կենդանիների ու պտղատու ծառերի համար հաստատել այնպիսի կայարաններ, որոնցից Հայ գիւղացիք կարողանային լիուլի օգտուել: Այսպիսով թէ ակցիօներական - երկրագործական ընկերութիւնը կշահուի առատապէս և թէ երկրագործ ու տնտեսապէս ընկճուած ժողովրդին մեծ բարիքներ արած կըլինի: Եօթերորդ՝ նշանակել Ուտիացոց աշխարհի համար այնպիսի շրջիկ քարոզիչ մի քահանայ և կամ վարդապետ, որ խօսելու և քարոզելու շնորհ ունենար, որ կոշտ ու կոպիտ գիւղացիների վերէջինդրութեան և ատելութեան աւերիչ սերմերը ջնջելու կարողութիւն ունենար, որի մշտական ընակութեան տեղը լինէր Ճալէթի վանքը և որի սրբազան պարտքը լինէր ձի նստել և շրջել գիւղէ գիւղ և անդադար քարոզէր ու համոզէր,